

NOTA

NA MADRUGADA del 9 de abril del 2008 finaba en Madril Diego Catalán. La so desaparición, fundamente sentida por toos cuantos lu conocieron, apreciaron y almiraron, arrampuñábanos una figura cimera de los estudios filolóxicos en plena y productible actividá intelectual, manifestada na serie d'obres maxistrales que diera a la imprenta a lo llargo de la postrer década de la so vida.

Precisamente nestos años últimos, dellos miembros del Seminariu de Filoloxía Asturiana frecuentaren el tratu con Diego Catalán pola mor d'una fecunda collaboración cola Fundación Ramón Menéndez Pidal. Esa collaboración concretábase alredu de dalgunos proxectos relativos al dominiu llingüísticu asturllionés qu'empataben directamente con vieyes moliciones del propiu Catalán, asina como nel nuestru interés por ciertos lliñes d'investigación y proxectos de temática asturiana, daquella menos trataos –o mesmamente aparaos– na Fundación.

En marcu d'esa collaboración, la Fundación participó nel congresu que, con motivu del centenariu de la publicación d'*El dialecto leonés* de Ramón Menéndez Pidal, se celebró –col títulu de *Cien años de Filoloxía Asturiana*– na Universidad d'Uviéu na seronda del añu 2006, y nel que'l propiu Diego Catalán foi parte del comité científicu.

Pero la muerte inesperada de Diego nun rompió aquellos llazos cola Fundación; al contrario, de dalgunos de los sos frutos –yá daquella en sazón– ofrezse agora la collecha, y asina'l volume terceru de la *Silva*

Asturiana, acabante de salir, dexa albidrar que se pueda completar la publicación d'esta serie romancística.

Otros proxectos aguarden, sicasí, la ocasión propicia; asina la reedición de los estudios sobre'l dominiu asturllionés de Menéndez Pidal y, sobremanera, la edición de la encuesta sobre les isogloses del asturianu, fecha por don Ramón nel 1910, y que Diego Catalán confió al Seminariu de Filoloxía Asturiana, que custodia los materiales inéditos que con tantu afán preparara él hai más de mediu sieglu.

Otramiente, el propiu Diego principiara una collaboración na *Revista de Filoloxía Asturiana* sobre dalgunos fluecos «ovetenses» de la historiografía medieval, de la que solo llegaría a espublizar la primer entrega.

Y n'espera de nueves contribuciones de Catalán sobre la «maraña textual pelagiana», aportó la noticia de la so muerte mentres prepará-bamos un volume doble de la *Revista*. Ente circunstancia tan luctuosa quixemos atrocar una sección específica del volume en preparación a fin d'homenaxar a Diego Catalán. La nuestra llamada tuvo respuesta inmediata en dalgunos colegas y amigos d'aquí, d'allá y d'acullá, convocaos pa evocar la so personalidá y glosar la so obra, tan amplia y polifacética, como bien illustren los estudios agora reuníos y, de manera pormenorizada, la so bibliografía. De resultes de too ello, el proxectáu volume doble vería enantada abondo la so estensión y la so cadencia temporal, y acabó convirtiéndose nesti númberu triple qu'agora, tres d'una trabayosa y llarga preparación, sal por fin a la lluz.

Conscientes de les reticencies que Diego Catalán manifestaría ente cualquier clas de homenaxe en vida, el Seminariu de Filoloxía Asturiana nun quixo dexar pasar la ocasión d'honar la memoria de quien punxo arrogantemente a la nuestra disposición la inmensidá de los sos conocimientos y l'amplitú de la so sabencia.